

# CUSSEGL GROND

Sessiun da december 2022

## Dumonda Brunold concernent ina strategia chantunala per implants fotovoltaics gronds

Dacurt è vegnida revedida la Lescha federala d'energia (LEn) sut il titel «Mesiras urgentas per garantir a curta vista il provediment d'electricitad durant l'enviern». Questa revisiun cumpiglia tranter auter la producziun d'electricitad cun implants fotovoltaics gronds. Ella è entrada en vigur il 1. d'october 2022 e vala fin ils 31 da december 2025. Areguard la producziun d'electricitad cun implants fotovoltaics gronds prevesa il dretg nov ch'il chantun dat la permissiun per implants fotovoltaics gronds. Però sto esser avant maun il consentiment da la vischnanca da staziunament sco er da las proprietarias e dals proprietaris dals bains immobigliars.

Sin fundament da las experientschas dals decennis passads ha il Cussegl grond concludì en la sessiun da favrer 2022 la Strategia concernent la forza idraulica 2022–2050. Cun la Strategia chantunala concernent la forza idraulica persequitescha il chantun tranter auter la finamira, d'augmentar en il chantun Grischun la creaziun da valurs ch'è colliada cun la producziun d'electricitad cun forza idraulica ed uschia da realisar retgavs persistents. Igl è inditgà ch'il chantun Grischun persequiteschia decidadamain ses interess a favur dal bainstar general grischun er en connex cun l'amplificaziun da l'energia solara ed en spezial cun la construcziun d'implants fotovoltaics gronds. Medemamain duain las vischnancas da staziunament potenzialas survegnir il meglier sustegn pussaivel dal chantun.

En quest connex vegn la Regenza supplitgada da responder las suandantas dumondas:

1. Co sa preschenta la procedura chantunala da permissiun per implants fotovoltaics gronds, cunzunt areguard las rollas da las vischnancas da staziunament sco er da las proprietarias e dals proprietaris dals bains immobigliars?
2. Pon tscherts princips da la Strategia chantunala concernent la forza idraulica vegnir applitgads er per ina strategia chantunala concernent implants fotovoltaics gronds? Sche gea, tgenins?
3. Fiss ina participaziun dal chantun, da las vischnancas da staziunament e/u da las proprietarias e dals proprietaris dals bains immobigliars ad implants fotovoltaics gronds raschunavla e pussaivla, per exempel cun participaziuns analogamain a la Strategia grischuna concernent la forza idraulica 2022–2050?

Cuira, ils 7 da december 2022

**Brunold,** Jochum, Menghini-Inauen, Adank, Beeli, Bergamin, Berther, Berweger, Bettinaglio, Biert, Binkert, Brandenburger, Bundi, Bürgi-Büchel, Candrian, Casutt, Censi, Collenberg, Cortesi, Crameri, Danuser (Cazas), Degiacomi, Della Cà, Derungs, Epp, Föhn, Furger, Gansner, Gartmann-Albin, Gort, Grass, Hartmann, Hefti, Hemmi, Holzinger-Loretz, Kasper, Kienz, Koch, Kohler, Krättli, Lamprecht, Lehner, Luzio, Maissen, Mani, Messmer-Blumer, Michael (Donat), Michael (Castasegna), Morf, Oesch, Perl, Rauch, Righetti, Roffler, Rüegg, Salis, Saratz Cazin, Sax, Schutz, Sgier, Spagnolatti, Tanner, Ulber, Weber, Wieland, Wilhelm, Zanetti (Sent), Zindel